



5. Radunanza cumünela dals 3.12.2014 a las 20.00 in sela polivalenta S-chanf

Presidi: Duri Campell

Actuar: Duri Schwenninger

Preschaints: Preschaints sun 27 votantas e votants

Scrutinaduors: Scu scrutinadur vegn elet Gian Cla Feuerstein

Tractandas:

1. Protocol da la radunanza dals 20.08.2014
2. Preventiv 2015
3. Pè d'imposta per l'an 2015
4. Schlargiamaint dals indrizs per l'alluntanaint da l'ova persa e pel provedimaint da l'ova potabla Somvih, credit per planisaziun, fr. 130'000.00
5. Recuors cunter deliberaziun credit fr. 1'000.00 per campagna votaziun regard l'aboliziun da la taxaziun pauschela d'impostas
6. Undrentschas per Mathilda Pernisch, Christian Camichel-Cola e Carla Robbi
7. Varia

La glista da tractandas vain approveda sainza objecziuns.

Protocol: Il protocol da la radunanza cumünela dals 20.08.2014 vain approvu cun granda magiurited e sainza cuntravusch.

20 0.205 Rendaquint/planisaziun da finanzas Preventiv 2015

Il president preschainta in detagl il plan d'investiziuns per l'an 2015 e spiega tar mincha posiziun il proget correspudent. Zieva cuorta discussiun decida la radunanza cun granda magiurited e sainza cuntravusch d'accepter tuot las investiziuns suot fr. 300'000.00. Las investiziuns sur fr. 300'000.00 vegnan suottamissas üna segunda vouta a la radunanza cumünela. Il plan d'investiziuns 2015 chi prevezza da fer investiziuns brüttas ill'otezza da fr. 3'447'000.00 cun entredgias in fuorma da subvenziuns e contribuziuns d'arduond fr. 335'000.00. Impü repassa il president ils posts i'l preventiv 2015 cun las pü grandas differenzas in conguel culs ans passos. Zieva chi sun gnidas dedas tuot las spiegaziuns

decida la radunanza d'accepter il preventiv 2015 cun granda magiurited e sainza cuntravusch.

**21 9.100 Pè d'impostas
Pè d'imposta per l'an 2015**

Il president spiega, cha'ls ultims ans s'ho pudieu serrer il rendaquint cumünel cun remarchabels guadagn. Las investiziuns i'ls ultims ans s'ho pudieu finanzcher cun egens mezs, sainza causer novs debits. Zieva cuorta discussiun decida la radunanza cun granda magiurited e sainza cuntravusch da lascher il pè d'imposta per l'an 2015 scu fin co sün 75% da l'imposta chantunela simpla.

**22 7.100 Chanalisaziun/sarinera
Schlargiamaint dals indrizs per l'allontanamaint da l'ova persa e
pel provedimaint da l'ova potabla Somvih, credit per planisaziun,
fr. 130'000.00**

Il depüto spiega, cha quist an chi vain es previs da fer l'ultima part da la lavur da renovaziun dals indrizs per l'allontanamaint da l'ova persa e pel provedimaint da l'ova potabla a S-chanf in Somvih, davent da la chesa Cadonau fin tar la chesa Meng. Per quella lavur s'ho lascho fer a l'indschegner Martin Gini ün quadern da dovairs per las lavuors d'indschegner e s'ho scrit our la lavur. Uossa sun avaunt maun offertas e'ls cuosts da planisaziun muntan a fr. 130'000.00. Per cha las lavuors paun gnir effettuedas quist an chi vain, as stu cumanzer bainbod la planisaziun. Sainza discussiun decida la radunanza da deliberer il credit ill'otezza da fr. 130'000.00 per la planisaziun dal proget.

**23 0.110 Legislativa
Recuors cunter deliberaziun credit fr. 1'000.00 per campagna
votaziun regard l'aboliziun da la taxaziun pauschela d'impostas**

Il president cumünel fo ün'introducziun e spiega, cha'ls 30 november 2014 ho gieu lö la votaziun da l'iniziativa «finischun cun privilegis d'impostas». Il böt da l'iniziativa d'eira l'aboliziun da la taxaziun pauschela d'impostas per persunas richas chi nun haun ün guadagn in Svizra. Cha eir a S-chanf sun avaunt maun persunas chi suottastaun a la taxaziun pauschela d'impostas. La part cha quellas persunas pejan es per l'an 2013 3.22% dal richev total da las impostas, 6.20% dal richev da las persunas natürelas. Il cussagl vaiva decis in sia tschanteda dals 29 october 2014 da sustgnair la campagna cun fr. 1'000.00. In merit es entro ün recuors a maun da la radunanza cumünela da Romedi Arquint regard la decisiun dal cussagl. Il recurrent fo valair, cha la vschinauncha nu po s'ingascher finanzielmaing tar campagnas politicas. Romedi Arquint es preschaint ed agiundscha, cha l'executiva nu po sustegner campagnas politicas cun munaida d'impostas. Zieva cuorta discussiun decida la radunanza cun 14 cunter 7 vuschs e 6 abstenziuns, da refüser il recuors.

**24 0.212 Persunel
Undrentschas per Mathilda Pernisch, Christian Camichel-Cola e
Carla Robbi**

Il president spiega, cha Carla Robbi es absainta causa vacanzas. Cun que vegn ella onureda in üna prosma radunanza. Mathilda Pernisch vain onureda dal president cumünel per sia lavur scu culuostra da la vschinauncha da S-chanf düraunt ils ultims 40 ans. A partir dals 1. november 2014 es ella ida in sia pensiun meriteda. Il president ingrazcha a Mathilda chi ho gieu bger sustegn da sieu hom Roman per la lavur prasteda e giavüscha al pèr tuot il bun per l'avegnir. Eir Christian Camichel-Cola es gnieu pensiuno ils 30 settember 2014 zieva bod 35 ans scu maister da sarinera. Eir ad el ingrazch'il president cumünel per la lavur prasteda e giavüscha tuot il bun per l'avegnir.

25 9.999 Varia

Il president spiega, cha la ledscha generela davart la refuorma dal territori es gnida accepteda dals votants. Cha cun que ho nossa regiun da cumanzer cun las lavuors preparatorias regard la nouv'organisaziun da las lezchas dal circul. Cun üna cuorta preschantaziun spiega'l, che lezchas cha nossa regiun ho d'organiser nouv. Cha'ls presidents cumünels haun già gieu üna prüma tschanteda in quel connex. Il president giavüscha, cha minchün dess fer impissamaints regard l'organisaziun futura e cha idejas sajan fich bainvisas.

Il president serra la radunanza a las 22.10 ed ingrazcha a tuot ils preschaints per lur cumparsa.

In buna fè

Il president:

L'actuar:

D. Campell

D. Schwenninger